

CARTA JEE NI TEE APOSTOL SAN PABLO NUU ÑAYUU ÑUU COLOSAS

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíin hermano yō Timoteo ²cátee ri carta yáha cuájeē nuū rohó ñáyuu ñuu Colosas, jeē cácuu ró ñáyuu maá yá jeē cácandíje vāha nuū Cristo. Te cáñuhun ni rī jeē Tatá yō Yaā Dios na sāha ga yā jeē vāha rōhó, te sāha ya jeē coo ndeyí coo siī ni rō.

Jeē jicán tahu Pablo jehē ñáyuu cácandíje

³Te jeē cájicān tahu rī nuū Yaā Dios, Yaā cúu Tatá maá Jítóho yō Jesucristo, te níni cánacuatáhú rí nuū yā jeē siquí rohó jíjnáhan ró. ⁴Chi ni cajini jñuhun ri ndese vāha cácandíje ró Cristo Jesús, jíin ndese cácanadáhu ni rō táca ñáyuu maá yá. ⁵Chi cáñuhun ni rō nihin rō jeē ñúhun vāha nde andiví cuu ró. Chi ná ni cajini ró jnúhun ndaā jeē jnáma ya rohó, te ni caquejéé ró ñúhun ni rō. ⁶Te jñuhun un jéé ní canacani nuū rō, chi ndúcuehē cuahān te níhín jníñu ní cáhnu ñayíví. Te suni súcuan ni sāha jíin rōhó jíjnáhan ró ndé quiví ní cajini ró te ni cajecūhun ni rō jeē ndaā

cúu jeē yóhyo vāha ni Yaā Dios jíin ró. ⁷Te jñuhun un cúu jeē ni stéén Epafras nuū rō, tēe sájniñu jíin rí jeē maní rī jíin. Chi cúu de tēe jéjníñu squícu vāha nuū Cristo jeē ndíto de rōhó. ⁸Te máá de ni castūhun núu rī siquí rohó, ndese cácanadáhu ni rō jnáhan ró sāha máá yá.

⁹Jeē yúcuan suni tu cájecuñī rī jeē cájicān tahu rī jehē rō, nde quiví ni níhín rī jñuhun ún te nde vijna. Te cájicān rī nuū yā jeē na jécūhun vāha ni rō te coo ndíchí ró jíin jnúhun ya, sāha máá Espíritu, návāha cuni rō ndihi ndese nújnahan ni maá yá. ¹⁰Te cájicān rī jeē caca ndaā rō nájñuhun cánuú caca ró jéé cácuu ró ñáyuu maá Jítóho yō. Te súcuan te sāha ró ndihi jeē nújnahan ni yā, te nihin jníñu ró jíin táca jniñu vāha, te jecūhun ga ni rō ndese Yaā cúu Yaā Dios. ¹¹Te cájicān rī jeē cuáha ya fuerza ini rō, nájñuhun íyó fuerza maá yá jeē cujéhnu luu ya. Te súcuan te cuu cuandeyí ni rō jíin táca-ni jñundóho, te cusí teyí ni rō. ¹²Te cuu nacuatáhú ró nuū Tatá yō, chi máá yá ni chihi fuerza yohó jéé iin cáhnu-ni jíin táca ñáyuu maá yá

nihin yō tahū yō. Chi cájica yó jíin luz yā jeē yíhi yó ndaha ya. ¹³Chi ni jnama ya yohó jéē ni yíhi yó ndaha máá jéē jníi poder nuū néē, te ni squívi ya yohó ndaha Séhe ya jeē maní yā jíin, ndácu ya jniñu nuū yō. ¹⁴Chi Séhe ya un ní jnama ya yohó jéē ni jíhi yā jehē yō, te ni ine cáhnu ni yā nuū cuēchi yó.

Jeē ni sáha Cristo jeē ní ndívi yó núu jnúhun maní Yaā Dios jíin yó

¹⁵Yaā Dios jeē tu cúu coto yó, ni sáha ya jeē ní quiji Séhe ya, te súcuan ni jito yó máá yá. Te Séhe ya ún, je íyó yá nde ná tu jecōo tāca jéē iyó. ¹⁶Chi jíin Séhe ya ni sáha Yaā Dios ndíhi jeē ni jécōo, ndíhi jeē iyó andívi jíin jéē iyó ñayívi, jeē jíní yō nuū jíin jéē tu jíní yō nuū. Te suni ni sáha ya tācá ndajéhé jeē cándacu jniñu, jíin jéē cándiso jniñu, jíin jéē cácujuhnu, jíin jéē cájníi poder. Jíin Cristo ni sáha Yaā Dios jeē ni jécōo ndíhi, te jeē cúu Cristo cúu. ¹⁷Te je íyó Cristo nde ná tu coo ndíhi jeē iyó. Te ndaha máá yá yíhi vāha ndíhi-ni. ¹⁸Te máá yá cújéhnú nuū ñáyuu cácandíje, nájñuhun cújéhnú xiní nuū yiqui cúñu, chi nájñuhun yiqui cúñu yā cácuu i, cúu jeē ñin na cúu i jíin yá. Te máá yá sáha jeē cotecu i níi cáni, te xihna gā maá yá ni natecu mēñu ndíyi, návāha cujéhnú ya nuū tācá-ni. ¹⁹Chi ni cusíi ni Yaā Dios jeē ndíhi ndese cúu máá yá, suni súcuan cúu Cristo. ²⁰Te siquí jeē ni jíhi Cristo, te ni cusíi ni Yaā Dios sáha ya jeē ndívicoo tācá-ni nuū jnúhun maní yā jíin, tāca jéē yúcu ñayívi jíin jéē yúcu andívi. Chi jíin jéē ní jíhi Cristo jicá cruz,

te ni sáha Yaā Dios jeē ndívicoo tācá-ni nuū jnúhun maní yā jíin.

²¹Te máá ró jijnáhan ró, chi sñin siquí ni cahíin ró ndé saá, te ni cajito uhū rō yā ini anuá rō, chi máni jniñu néé ní casáha ró. Te vijna chi je ni sáha Yaā Dios jeē ní ndívicoo ró núu jnúhun maní yā jíin ró. ²²Súcuan ni sáha ya siquí jeē ni sócō Cristo maá yá ni jíhi yā, návāha coo ndoo coo íi rō cuiñi ró núu yā, te ma cóo jnéhén ró, te tú na cuēchi coo siquí rō. ²³Te súcuan sáha ya núu cuiñi nihin ró jéē candíje vāha ró, te núu quendōo nihin ró jíin jnúhun vāha jeē cáñuhun ni rō jeē jnáma ya rohó, te ma siaá cuiti rō. Chi jñuhun un ní cajini ró, te ni jite núu níi cáhnu ñayívi. Te ruhū Pablo suni jéjníñu ri jeē nácani ri jñuhun ún.

Jeē jejniñu Pablo siquí ñáyuu cácandíje

²⁴Te vijna te cúsiñi ni rí jeē ndóho ri jehē rō jijnáhan ró. Chi jíin yiqui cúñu ri ndóho ri jeē cúmani gā ndoho ri jíin Cristo jehē ñáyuu cácandíje, suu ñáyuu cúu nájñuhun yiqui cúñu yā. ²⁵Te cúu ri tēe jéjníñu siquí ñáyuu cácandíje, chi súcuan ni tejníñu Yaā Dios ruhū, návāha nacani ndíhi ri jñuhun ya nuū rō te quendōo vāha ró. ²⁶Te nácani ri jñuhun ya jeē ní yisáhi, jeē tu ní cájini ñáyuu nde jenahán ndasí te nde níi cáni vēji. Te vijna te je ni steén cají yá jñuhun un núu ñáyuu maá yá. ²⁷Chi ni cusíi ni yā jeē steén yā nuū i ndese cúcúca ndasí i jíin ndíhi jeē ndíso jñuhun sáhi yáha jéē lúu cújéhnú, te cuitē núu quihín nuū tācá nación jeē tu

jíní. Te jnūhun sāhi yáha cúu jeē ndeé Cristo ini anuá rō, ndúú yá jín rō, te jeē yúcuan cáñuhun ni rō táca jéé lúu jéñnu jeē coo.

²⁸Te jnūhun Cristo un cúu jeē cánacani ri, te cástíhví ni rī táca ñáyuu, te cástéén rī jnūhun ya návaha jecūhun vāha ni i. Te súcuan te ije vāha ni ndívii i jeē yíhi i ndaha Cristo Jesús. ²⁹Te siquī yúcuan cúu jeē sájniñu ri, chi ndíhví ni rī nácani ri jnūhun jíin táca fuerza Cristo jeē chindéé ñájnāhan ya jíin rí.

2 Chi cúní rī jeē na jécūhun ni rō ndese yōhyo ndúcú ndéyí rí jehē rō, jíin jéhē ñayuu ñuu Laodicea, jíin ndé táca ñáyuu jeē tu ní cájini cuiti nuū rī. ²Chi cúní rī jeē coo ndeyí ni anuá i, te inuú-ni coyūcu mání i, te jecūhun ndíhi ni i ndese yōhyo cúcá i jíin jnúhun jeē candíje nihin i. Chi cuni i ndese Yaā cúu Cristo, chi máá yá cúu jnūhun Yaā Dios jeē ni yísāhí un. ³Te ini Cristo yísāhí táca jnúhun jeē cucúcá rō jíin, suu jnūhun ndíchí jíin jnúhun jécūhun ni. ⁴Te jnūhun yáha cáhán rī jíin rō jijnāhan rō, návaha ma stahú ni ñin i rōhó jíin táca jnúhun stáhú jéé lúu cáhán. ⁵Chi vēsú ndeé jícá rí jíin rō, te ñúhun ni rī rohó, te cúsiñ ni rī jeē jíní rī ndese cájica ndaā rō te cácandíje nihin rō Cristo.

⁶Núu súcuan te nájñuhun ni cajetáhú rō jeē Jítoho rō cúu Jesucristo, suni súcuan na cáca ndaā rō jíin yá. ⁷Te na jnái vāha jnūhun ya ini rō, te na íje vāha rō jíin jnúhun cácandíje rō yá, nájñuhun je ni cajini rō. Te níní nacuatáhú rō nuū Yaā Dios.

Jeē ndújeé yó sáha Cristo

⁸Coto má cuāha rō jnúhun jeē stahú ni ñin ñayuu rohó jíin jnúhun ndíchí jéé tu jéjñíñu, jíin jnúhun ndúxí stáhú. Chi tu cácandíje i jnūhun Cristo, chi sa cácandíje i táca jéé tajnúní ñayuu, modo jeē castéén ini ñayívi yáha.

⁹Chi ndíhi ndese cúu máá Yaā Dios, suni súcuan cúu Cristo. ¹⁰Te ndíhi ndese cúu Cristo, suni súcuan cúu rō jijnāhan rō, chi cáyíhi rō ndaha ya. Te máá yá cújéñnu nuū táca jéé cujéñnu jíin jéé ndíso jnínñu andíví. ¹¹Te siquī jeē cáyíhi rō ndaha ya, suu cúu jeē nájñuhun ni cuu rō circuncidar. Te jeē súcuan ni sáha ya circuncidar rohó, chi nasūú ñin jnuni jeē yíhi yiquí cúñu rō cúu, chi sa suhva jeē ní sándoo ya táca cuéchi ni casáha rō jíin modo neé máá rō. Chi súcuan cúu jeē sáha Cristo circuncidar rohó. ¹²Te jeē ní cajendute rō cúu nájñuhun jeē ní quindūji rō jíin Cristo, te suni nájñuhun jeē ní natecu rō jíin yá. Chi ni cacandíje rō jéé jíin poder Yaā Dios ni nastécu yā Cristo mēhñu ndíyi. ¹³Chi ni cacuu rō nájñuhun ndíyi nuū yā siquī cuéchi rō, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ní cáni jíin Cristo, chi ni ine cáñnu ni yā nuū táca cuéchi rō. ¹⁴Te nájñuhun jeē iyó ñin acta jeē jicán cuéchi siquí yō jeē ni stívi yó ley yā. Te ni ndahva yā acta un, chi ni chunaa Cristo cuéchi yó jéé ni jíhi yā jicā cruz. ¹⁵Chi ná ni jihí yā jicā cruz, te ni quende yā ndíhi poder táca jéneé jéé cácujeñnu jíin jéé cájniñ poder.

Te ni quende yā jeē tuá cujéhnū, chi ni sáha ya jeē cuángoo nuū quíndihyū, te súcuan ni steén yā poder yā.

**Na ndúcú yó jeē quéndōo
vāha yó ndé andíví**

¹⁶Núu súcuan te ma cuatáhú ró núu cácahān ñayuu cuēchi siquī rō, siquī ñin jeē yéji rō chí síquī ñin jeē jíhi ró, chí jéé tu nées ñi rō quivī víco jíin quívī núcōsō yoō jíin quívī ndétātú. ¹⁷Chi tāca ley siquī un ní jejnīñu máá ndé ná tu quiji Cristo. Te vijna te ni quiji ya te tuá jíni nūhún tāca ún. ¹⁸Ma cuáha ro jnúhun jeē cásí ni ñin ñayuu jeē nihín rō tahū rō. Chi cáchiñúhún i tācá ndajéhé yā, te cácahān i jeē súcuan cásáha suchí i máá i. Te cácahān i jeē cájini ndije i jeē iyó ndáā jnúhun cánacani i, te tuú. Te súcuan cásáha téyí sáá-ni i máá i, chí cájeni néé ni i. ¹⁹Te tu cáhiin i jíin Cristo, Yaā cujéhnū nuū ñayuu cácuu nájñuhun yiqui cúñu yā chí ñin na cúu i jíin yá. Chi máá yá scuéhnu ya i jíin jnúhun ya, te nduu ñnuú ni tācá i jeē cáhije i cuahān i, nájñuhun ni jeni ni Yaā Dios.

²⁰Núu súcuan te nájñuhun jeē je ni cajihí rō jíin Cristo, cúu jeē ní casiáá rō tāca jéé tajnúni jeē castéén ini ñayívi. Núu súcuan éte naun cásáha ga rō nájñuhun cásáha ñayuu ñayívi jéé jéndije ró tāca jéé tajnúni? ²¹Chi cácahān i: Ma quehé ró ma caji rō jeē yáha chí jéé yúcuan, ni ma jníí ró, áchí i. ²²Te máni jeē tajnúni ñayuu jíin costumbre máá i cúu te tu níhín jniñu jeē quéndōo ndaā ñayuu. ²³Te ndaā chí cájeni ni i jeē jnúhun

ndíchí cúu ún, chí sáha jíin i jeē chíñúhún níhin i, jíin jéé sáha suchí i máá i, jíin jéé stóho i yiqui cúñu i. Te tu níhín jniñu cuiti jeē casi tācá jniñu néé jéé cuní i sáha i.

3 Núu súcuan te nájñuhun ni natecu Cristo, suni súcuan ni canatecu rō jeē ní cuu ró nájñuhun ndíyí ni sáha cuēchi ró. Te na cóndihvī ni rō siquī tāca jéé iyó andíví núu ndeé Cristo lado váha Yaā Dios nuū cujéhnū ya. ²Te na cáni ni rō siquī tāca jéé iyó andíví, nasūu siquī jeē iyó ini ñayívi. ³Chi nájñuhun je ni cajihí rō jíin Cristo, te vijna chí nájñuhun cátecu rō jíin yá andíví, chí cáyihí ró ini ndaha Yaā Dios. ⁴Te quivī ndíji Cristo, Yaā sáha jeē cótecu yō níí cáni, yūcuán na te suni quendacoo ndíjin maá ró jíin yá, te cujéhnū luu ró jíin yá.

**Ñayuu jíca jíin modo cuní
maá, jíin ñayuu ní ndujeé**

⁵Núu súcuan te casi rō tāca modo cuní maá ró jeē cáhiyo ró ini ñayívi yáha. Chi ma cáca jnéni ró, ma sáha ró jniñu jnéhén, ma ndíyo ni rō sáha ró tāca jniñu néé, ma cutóo ró, ma ndíyo ni rō ndajniñu. Chi tācá ndajniñu jeē ndíyo ni yō cúu nájñuhun ídolo yō jeē chíñúhún yó. ⁶Chi siquī tācá jniñu yáha cúu jeē cuāha Yaā Dios castigo xeēn nuū ñayuu nihni ni nuū yā. ⁷Te suni jíin jniñu yáha ní cajica ró ndé saá, ná ni casáha ró súcuan. ⁸Te vijna te na stóo ró tāca jéé yáha: jeē quití ni, jeē xeēn ni, jeē sáha jniñu néé, jeē cahán ndevāha nuū jnáhan, jíin jéé cahán tāca jnúhun tú váha. ⁹Ma stahú ró jnáhan ró, chí yúcuan cúu modo

maá ró jeē ní cajica ró jíin ndé saá, te je ni castóo ró. ¹⁰Te ni canduu ró ñayuu jeé, cuandacu ró máá Yaā ni sáha róhó, te cuajecūhun vāha ni rō ndese Yaā cúu ya. ¹¹Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jicá, ni ñayuu yucú jeē ní indāa néé, ni mozo jeē ní jeen ñayuu, ni ñayuu sájniñu cuenta maá, chi inuú cúu ndíhi i nuū yā. Chi Cristo cúu Jítoho ndíhi i, te ndéé yá ini anuá ndíhi i, ndúú yá jíin i.

¹²Chi ni nacāji Yaā Dios rohó jíjnáhan ró jeē cúu ró ñayuu maá yá jeē maní yā jíin. Núu súcuan te níni cundáhú ni rō jnáhan ró, te coo vāha ni rō jíin jnáhan ró. Te coo suchí ni rō, te coo vitá ni rō, te coo paciencia ni rō. ¹³Cuandeyí ni rō jíin jnáhan ró, te cone cáhnu ni rō nuū i te núu na vé ni sáha i nuū rō. Chi nájnūhun ni ine cáhnu ni Cristo nuū rō, suni súcuan sáha máá ró.

¹⁴Te jeē cánuú gá cúu jeē cundáhú ndasí ni rō jnáhan ró. Chi yūcuan sáha jeē ndúu inuú ni rō te íje vāha ni rō jíin jniñu vāha. ¹⁵Te jñūhun coyūcu mánī na cúnuú ini anuá rō sáha Yaā Dios. Chi ni cana ya rohó jéē nduu ró ñin na ñayuu jéē cóyūcu mánī rō. Te níni na nácuatáhú ró nuū yā.

¹⁶Te scuáha vāha ró jñūhun Cristo návāha cunuú jñūhun ún ini anuá rō. Te stéén rō nuū jnáhan ró, te stíhví ni rō i jíin táca jñūhun ndíchí yá. Te jíin salmo jíin himno, yaa ii jeē cahán jñūhun ya, na cáta luu ró jéē nácuatáhú ró ini anuá rō nuū Yaā Dios. ¹⁷Te tēcá jniñu sáha ró,

núu jeē cahán rō chí jéē sáha ró cúu, ndíhi na sáha ró jéē ndujéhnū síhví máá Jítoho yō Jesús, te nacuatáhú ró núu Tatá yō Yaā Dios sáha ya.

Ndese cánuú squícu ñayuu cáccandíje nuū jnáhan i

¹⁸Róhó ñahan cácuu ñasíhí, cuatáhú ró nuū yíi ró, chí súcuan cánuú sáha ró síquí jeē candíje ró Jítoho yō. ¹⁹Te róhó téé cácuu yíi, cundáhú ni rō ñasíhí ró, te ma cútucu ni rō jíin ña. ²⁰Róhó séhe jíjnáhan ró, tēcá-ni jniñu cuandije ró núu tatá rō nuū naná rō, chí súcuan cúsií ni maá Jítoho yō. ²¹Te róhó tátá jíjnáhan ró, ma squítí ni rō séhe ró, návāha ma cucuíhyá ni i. ²²Róhó mozo jíjnáhan ró, tēcá-ni jniñu cuandije ró núu patrón rō ñayívi yáha. Ma sájniñu ndúxí ró jeē maá jéē coto de te cuajnúhún de róhó. Chi na sájniñu ndaā sájniñu ndije ró, te conso íyo ró núu Yaā Dios. ²³Te tēcá jniñu sáha ró, na cúsií ni rō sáha ró, te na cáni ni rō jeē nuū Jítoho yō cájejniñu ró, nasūu núu ñayuu. ²⁴Chi je cájini rō jeē maá Jítoho yō cuáha ya cuehē tahū cuu ró níí cáni. Chi nuū maá Cristo cájejniñu ró, chí máá yá cúu Jítoho rō. ²⁵Te ñayuu casáha jniñu néé, chí sa suhva ndutahū i síquí jeē ni sáha i. Chi tu sáha Yaā Dios cuenta ndese cúu ñin ñin ñayuu, chí inuú sáha ya jíin i.

4 Róhó patrón jíjnáhan ró, vāha ndaā na sáha ró jíin mozo rō. Te na núcūhun ni rō jeē suni íyó Jítoho maá ró, Yaā ndeé andíví.

²Te ndívii rō ma jécuiñí rō jeē jicán tahú rō, chí coo ndito ni

rō jíin, te nacuatáhú ró núu Yaā Dios. ³Te suni cacān tahú rō jehē rī jijnáhan ri, jeē na sáha Yaā Dios jeē cóo ga modo nacani ri jnūhun, návāha cuu cahān rī jnūhun Cristo jeē ní yisāhí, jeē tu ní cājini ñayuu jenahán. Te siquī jnūhun un cúu jeē íne ri vecāa. ⁴Te cacān tahú rō jeē cuu cahān cají rí ndese cánuú cahān rī.

⁵Sáha yúcun váha ró jíin ñáyuu tu cácanđije. Ma cúhuun ni rō siquī i, chi condíhvī ni rō scandíje ró i. ⁶Te máni cahān vāha ró jíin ñáyuu, te cahān rō jnūhun cuajniñu jeē quéndōo vāha i sáha. Te cani ni rō ndese vāha nastíó cuñí rō jnūhun nuū iin iin i.

Saludo jeē sándīhí

⁷Tíquico cúu iin hermano jeē maní yō jíin, te tēe squícu vāha chindéé ñájnáhan jíin rí cúu de, te jéjnīñu de jíin rí nuū maá Jítoho yō. Te máa de castūhún ndihī nuū rō ndese cuahān jniñu ri. ⁸Jeē yúcuan ní tají rí de cuajeē de nuū rō jijnáhan ró, návāha cuni rō ndese cáhiyo ri jíin jniñu, te coo ndeyí ni rō sáha de. ⁹Te suni cuajeē Onésimo jíin de, tēe cúu jnáhan máa ró jijnáhan ró. Te cúu de hermano jeē squícu vāha jeē maní yō jíin. Te ndindúú de castūhun núu rō ndese cuahān tācá jniñu ichi cháha.

¹⁰Sándeyí ni rō jijnáhan ró, áchí Aristarco, tēe íne jíin rí vecāa. Te suni súcuan cáhán Marcos, ñani primo Bernabé. Te je ni ndacu ri jniñu nuū rō siquī Marcos, te núu

ni jecondēhé de rōhó te sáha vāha ró jíin de. ¹¹Te suni súcuan cáhán Jesús, tēe jeē suni nání Justo, jeē sándeyí ni rō. Te máa-ni de cácuu tēe hebreo cácanđije jeē chindéé ñáhán cánacani jnūhun jíin rí siquī ndese ndácu Yaā Dios jniñu. Te yōhyo ndeyí íyó ni rī casáha de. ¹²Sándeyí ni rō jijnáhan ró, áchí Epafras, tēe cúu jnáhan máa ró, te mozo Cristo cúu de. Te níni jícan tahú ndasí de jehē rō, jeē na cuñí nihin ró, te ije vāha ni rō jeē squícu vāha ró ndihī jniñu cúní Yaā Dios. ¹³Chi cáhán ndaā rī jeē yōhyo ndíhvī ni de jehē rō jijnáhan ró, jíin jéhē ñáyuu ñuu Laodicea jíin Hierápolis. ¹⁴Lucas, tēe cúu médico jeē maní yō jíin, suni cáhán de jeē sándeyí ni rō, te suni súcuan cáhán Demas.

¹⁵Cachi rō nuū tācá hermano ñuu Laodicea jeē sándeyí ni i, áchí rí. Te suni súcuan cahān rō jíin Ninfas, jíin táca ñáyuu cácanđije cándutútú vehe ña. ¹⁶Te ná ni jīnu ni cacahu ró carta yáha, te suni tají ró na cáhu ñayuu cácanđije ñuu Laodicea. Te suni cahu máa ró carta jeē cuahán nuū ñáyuu Laodicea te ndiji nuū rō. ¹⁷Te cachi rō nuū Arquivo jeē na ndúcú ndeyí de squícu de jniñu ní tee Jitoho yō siquī de, áchí rí.

¹⁸Ruhū Pablo, yāhá-ni cúu jeē tēe ri jíin ndaha máa rí, jeē sándeyí ni rō. Te nucūhun ni rō ruhū jeē íne ri vecāa. Te ñūhun ni rī jeē na sáha ga Yaā Dios jeē vāha rōhó jijnáhan ró. Súcuan na cóo. Amén.